

❖ PAN DDAETH YR AWR

Ti, O Dduw, yw Creawdwr y bydoedd:
 ti a roddaist fflam i'r haul,
 llewyrch i'r lloer
 a sirioldeb i'r sêr;
 ti a greaist ddyn ar dy ddelw
 a'i osod ynghanol amrywiaeth y cread,
 ei dir a'i fôr,
 ei ddydd a'i nos,
 ei fryniau a'i ddyffrynnoedd,
 ei goed a'i blanhigion,
 ei adar a'i anifeiliaid oll.

Er hynny, crwydrodd dyn ymhell oddi wrthyt ti;
 ond pan ddaeth yr awr
 trefnaist ffordd i'w ddwyn yn ôl:
 anfonaist dy Fab dy hun
 ar y Nadolig cyntaf
 yn faban gwynfydedig;
 daeth y Gair bywiol i wisg o gnawd,
 daeth tragwyddoldeb i breseb bach,
 a daeth Mair yn fam fendigaidd
 i Geidwad y byd.

Diolchwn i ti am y newyddion da
 a lanwodd wacter y byd;
 am glod yr angylion
 a ddeffrôdd y gân
 yng nghalonau meibion a merched dynion.

Diolch i ti am y bugeiliaid
 a ddaeth o dawelwch y meysydd
 i bentre Bethlehem
 i geisio'r Oen di-fai;
 ac am ddoethion a ddaeth o bellter byd
 i roi eu rhoddion drud
 i Arglwydd pob doethineb.

Cynorthwya ni i ddathlu'r Nadolig hwn
 dan gymhelliad yr Ysbryd Glân:
 cadw'n llawenydd yn bur,
 ac ym mhob rholi a derbyn
 gwna ni'n gyfryngau dy gariad di.

Uwchlaw pob peth
 cynorthwya bobloedd y byd
 i faddau i'w gilydd
 fel yr wyt ti yn maddau i ni,
 fel y daw Tywysog Tangnefedd
 i'w deyrnas yn ein calonnau oll,
 ac fel y byddo gogoniant yn y goruchaf i Dduw
 a thangnefedd ar y ddaear
 i bawb sy'n ei dderbyn ef.

W. Rhys Nicholas